

بِسْمِ اللَّهِ الرَّحْمَنِ الرَّحِيمِ



## *Khutba Jummah*

*Hazrat Khalifatullah Muir. A. Azim (atba)*

13 Mars 2020  
18 Rajab 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

### *Bane Signes d'Allah (Pt.1)*

*Alhamdulillah, Summa Alhamdulillah*, après bane messages ki mo fine recevoir de la part d'Allah lors Coronavirus et bane les autres catastrophes ki pou frappe sa le monde là, mo pou concentrer le sujet de mo bane Khutba pour le moment lors sa bane sujets d'actualités là, et *Insha-Allah* mo pou révine ensuite lors le sujet de bane Attributs d'Allah (4<sup>ème</sup> partie).

Saki pé passer dans la Chine, avec propagation Coronavirus et aussi dans bane les autres pays à travers le monde, sa situation là pou empirer. Sa situation là li matière à réflexion parski celui ki sème la haine contre l'Islam et contre bane musulmans, li pou très certainement récolter la punition divine.

Allah dire dans Quran Shareef : **Wa maa kaana li-nafsin 'antu' mina 'illaa bi-'Iz-nillaah: wa yaj'-alu-rijsa 'alal-laziina laa ya'-qiluun.**

*C'est pas possible ki kikaine gagne la foi, excepter par la grâce d'Allah. Et Li envoye punition lor bane ki refuse comprend. (Yunus 10 : 101)*

Depuis le début de sa siècle là, fine ena beaucoup catastrophes ; nous capave dire, catastrophes lors catastrophes. Faire zot bane analyses et jugements et guetter, et même plisse ki sa, alle réfléchi lors tous saki fine passé depuis le commencement de sa siècle là, depuis l'an 2001, le nouveau millénaire [à partir 1<sup>er</sup> Janvier 2001]. Beaucoup l'évènements fine passés, à commencer par mo expulsion de l'Association Musulmane Ahmadiyya [Jamaat Ahmadiyya], et kot mo fine bizin faire face beaucoup d'épreuves. Fine ena : bane propagandes de haine contre moi dans tous bane Masjids Ahmadiyya entier l'île, et même dans bane l'îles avoisinantes et bane les autres pays. Kifaire ena sa la haine là ? Pourtant, mo ni voleur, ni fraudeur, ni magouilleur, ni menteur, ni fine fabrique bane fausses zistoires, et ni mo fine appelle bane dimounes pou prier plusieurs dieux ! Non, mo pas tout ça là ! Mais mo fine bizin traverse tous sa bane épreuves là et sa bane boycottées et moqueries là seulement à cause le fait ki mo fine proclamé ki Allah cause avec moi et ki mo gagne révélation divine.

Malgré tous zot bane stratégies et complots, Allah contigner révèle moi So bane messages et envoie bane signes de toutes sortes afin ki bane dimounes et toute l'humanité capave réfléchi et reforme zot conduite. Révélation pé contigner déssane couma ene la pluie du ciel afin ki mo mette l'humanité en garde contre bane dangers ki pé menacer pou tomber.

Mo fine faire plusieurs Khutba lors sa sujet là, et fine ena ene mo bane l'article lors le sujet ki ti paraite dans journal « Le Mauricien » pour mette bane dimounes en garde ki l'humanité en danger.

Zot conner, kan Allah (swt) envoie ene prophète, Li donne li aussi bane messages afin ki li capave averti le monde. Et alors bane dimounes recevoir ene certain délai pour reforme zot la vies, pour éloigne zot du mal et vine lors le droit chemin. Et de plus, sa Messenger là vini aussi comme ene porteur de bonnes nouvelles pour tous bane ki prend le chemin droit, croire sincèrement en li et bane messages d'Allah et faire bane bonnes actions, tout en soumettant au Dieu Unique – Allah (swt).

Li bien dommage ki tout au long de so la vie [*exception parfois dans bane derniers moments de so la vie*] bien tiguite dimounes accepter sa Messenger d'Allah là et reconnaite la Manifestation Divine. C'est après so la mort, après des z'années et des z'années ki bane dimounes apprane pou reconnaite so véracité et croire dans li et bane signes divines ki li ti apporté.

Donc, durant la vie d'ene Messenger de Dieu, la plupart de bane dimounes tourne le dos avec li et faire sourde d'oreille et aveugle. En plisse de sa, zot faire toutes sortes de complots pour fini li et aussi so message.

Aujourd'hui zot capave réaliser et réfléchi lors sa verset ki mo fine fek lire devant zot là. Faudé pas servi sa verset là comme ene prétexte pour pas croire, kot faudé pas nous dire ki « *C'est Allah Li-même Qui fine oulé sa coumsa et c'est Li ki fine décider ki nous vine couma nous été [en ce moment].* » Faudé pas nous dire sa !

Croire [et gagne la foi] li pas ene accident ; c'est le résultat d'ene processus intellectuel ki passe en revue nous conscience et nous état d'âme et critique zot à la lumière de saki raisonnable, sensé, logique et ki conformer à la loi de la nature. Croire li forme partie de l'homme [li dans so nature]; et kan li gagne la foi [li croire] li alors reste fidèle à so nature.

Allah dire : **Fitrat-Allaah-illatii fataran-naasa 'alayhaa.**

*Et suive la nature ki Allah fine faire, nature avec quoi Li fine façonne bane dimounes. (Ar-Rum 30 : 31).*

Zot bizin réaliser saki pé passer dans sa le monde là. Ki sa le monde là pé dévini? Catastrophe lors catastrophe, nous pas pé trouve ene la fin de tout sa.

Permette-moi en bref pou faire zot rappelle détrois catastrophes ki fine arriver dans sa siècle là (parmi bane milliers catastrophes ki fine ena) – mo pas pou capave alle trop longue lors là dans ene Khutba, mais mo pou mentionne quelques-z'uns seulement – parski le Créateur fine choisir moi couma So Messenger depuis le début de sa siècle là (que ce sois islamique et général). Peut-être ki zot fine oublié ki :

1. L'Ouragan Katrina ti dévasté la Nouvelle-Orléande dans l'Amérique et ti également secoué le monde entier.

**[Depuis le début de la Manifestation Divine, Allah (swt) fine révèle moi tout saki pou arriver et bane dimounes ki ti autour de moi fine témoigne sa et zot fine note sa bane révélations là ainsi ki encore bane les autres révélations, et alors si sa bane dimounes là penser ki mo pé cause menti, mo ti pou content ki zot vine**

**de l'avant pour démenti moi et ki zot faire serment lors nom Allah et zot dire ki mo ene menteur.**

**Kan certains de sa bane révélations là fine réalisé, mo fine recevoir beaucoup coup de téléphone [lors mo portab] pour informe moi bane l'évènements ki fine passés tandique ki moi-même, mo pas ti même conner saki ti pé passé. Zot ti pé rode moi partout pou informe moi de la réalisation de sa bane révélations là et quant à moi, mo ti retire moi dans *Bait-ul-Zikr* pour concentrer dans mo bane *duahs* et mo *Zikr (Zikrullah)*. Kan mo dans sa l'état là, kot mo coupé du monde, mo jette moi dans les bras de mo Créateur couma ene tibébé ki cherche l'amour et le réconfort de so mama. Connexion avec Allah li plus doux ki l'amour d'ene mama. Zot pas pou capave même imaginer couma sa l'amour divine là li extraordinaire, li bien bien doux. Que ce sois dans sa bane moments au commencement de la Manifestation Divine, et que ce sois maintenant, mo pas ouler les autres kitchoses. Mo ouler seulement l'amour de mo Maître, mo Allah. **Donc, mo révine lors mo sujet d'aujourd'hui.]****

Sa l'évènement là fine prouvé ki même ene de bane pays ki plus puissants au monde, ki techniquement équipé et ki matériellement épanoui, sa même pays là fine vine impuissants et délaissé face à la nature.

Réssamman, bane calamités naturelles pé suive de près, ene derrière l'autre, et bane rapports de bane telles nouvelles pé rétentir couma lors ene champ de bataille. Mais cette fois bane opposants pé paraite comme si c'est la nature contre l'humanité.

2. Bane oiseaux migrateurs fine propage la grippe aviaire ki ti étendre du Sud-Est de l'Asie ziska l'Europe. Ti annonce bane quarantaines ki ti pou bizin imposé dans cinq régions de la Russie. Le 14 Septembre 2005, bane scientifiques italiens fine déclarer ki même le virus aviaire ki moin dangereux du type « H7N3H » capave transmette à l'homme. Ene transmission du virus aviaire à l'homme ki dézà contaminé par le virus de la grippe humaine pou capave créer ene pandémie dangereux ki inévitable.

3. Fine déjà ena ene épidémie « de l'encéphalite japonais » dans l'Inde et dans Népal, ki fine faire approximativement 700 morts.

4. Dans la Chine, en plus de l'épidémie porc (Streptocoque 2) ki ena ene taux de mortalité très élevé parmi bane ki affecter avec sa, nous fine témoigne l'apparition d'ene nouvo épidémie inconnue ki fine touye plusieurs paysans dans bane provinces du sud de la Chine.

5. Le Tsunami... [sa jour là même kan sa Tsunami là fine manifester, le matin avant *Salat-ul-Tahajjud* kan mo ti pé faire *duahs*, Allah (swt) faire moi trouve ene grand Tsunami ki fine touche plusieurs pays et en même temps mo fine entende sa *Nazm* (en Urdu) là: « **Toufaané Zalaalat sé Ya Rab tou bachadéna...** » et sa gramatin là même le 26 Décembre 2004, nous ti organise ene randonnée à Plaine Champagne avec bane *Sahib-al-Alam* de Jamaat Ahmadiyya Al Mouslemeen. Après Salat-ul-Fajr, avec tous sa bane jeunes ki ti autour de moi à sa l'époque là, mo fine raconté saki Allah fine faire trouver : ene grand Tsunami. Alors, avant démarrer pour sa randonnée là, nous fine faire beaucoup *duahs*. Ensuite, nous fine démarrer et dans le minibus, mo fine dire chauffeur là ki à l'heure de bane informations pou allume radio pour ki mo capave écoute bane nouvelles. Mais depuis le matin jusqu'à trois heures et demi de l'après-midi, pas ti ena nannié dans informations, comme-ci tout pé passe bien. Kan nous fine fini randonnée et fine rentre la caze, après ki mo fine prend ene bain, deux jeunes *Sahib-al-Alam* de Jamaat Ahmadiyya Al Mouslemeen à sa l'époque là fine téléphone moi pour annonce sa '*Breaking News*' là. Zot fine informe moi à propos de Tsunami ki fine ena dans l'Indonésie.] ... Donc, le Tsunami ki fine ena lieu en décembre 2004 en Asie du Sud fine faire environ 300,000 morts. Plusieurs pays européens ti bien toucher par sa et zot aussi zot ti inondés.

6. Et pas oublier aussi bane feux de forêt massifs ki fine ena à plusieurs reprises et ki fine ravage la Russie et bane les autres pays Européens (comme le Portugal etc.).

7. Avec le passage du temps, bane rapports de bane accidents d'avion népli étonne dimounes et zot fine vine couma bane phénomène ordinaire. Si zot jette ene coup d'œil lors là, zot pou constater commié accidents avion fine ena kot sa bane avions là fine crazé et fine faire ene bon nombre de morts.

Tout sa là, en résumé forme partie de bane révélations ki mo fine recevoir au commencement de sa siècle là. Depuis le début de la Manifestation Divine, ena beaucoup fine témoigner de la véracité de sa bane révélations là. Même

aujourd'hui tous sa bane phénomènes là zot bane signes de mo véracité et celui de la Manifestation Divine de sa siècle là.

C'est à cause de bane révélations divines – le fait ki mo recevoir bane révélations de la part d'Allah – ki sa bane *Zaalim* là fine créer beaucoup difficultés et désordres et bane complots pour moi. Zot fine invente bane grands mensonges contre moi.

Aujourd'hui mo adresse moi à tous bane ki fine croire dans moi et aussi à bane ki pas fine croire dans moi, bane ki pé faire sourd d'oreille et aveugle, mo dire zot : Moi, mo fine faire mo travail et mo pé contigner donne le message et ene jour pou vini très certainement kot zot pou bizin réponde devant le Créateur pour tous zot bane actions. Sa jour là pou vini, péna aucaine doute lors là. *Insha-Allah*. Alors, lever ! Prend conscience de zot bane péchés et zot bane faiblesses et réforme zot avant ki li trop tard.

Ki nous lé monde pé devini ? Kifaire tous sa bane phénomènes là pé produire de plus en plus, pé vine pli fréquent et en grand nombre? D'après bane scientifiques, fine déza ena bane périodes de cataclysmes pareil coumsa dans l'histoire. Dans 1918, dimounes fine plore 20 millions de morts dans dix-huit mois à cause ene épidémie de grippe. La Bible cause avec nous à propos du déluge. Fine mentionner ki c'est ene grand déclin de la moralité de l'humanité ki ti la cause de tout sa. Bane scientifiques fine dezà découvert bane preuves convaincants de sa inondation là. Par exemple, plusieurs la villes et pièces d'architectures fine retrouvé au fond de l'océan.

Et dans Quran Shareef, Allah (swt) fine dire : **« Péna aucaine la ville [injuste] ki Nous pas fine détruire, avant le Jour du Jugement, ou bien puni avec ene punition terrible. Sa fine écrire dans le livre [des décrets inchangeables]. »** (Al-Isra 17 : 59)

Nous bizin noter ki Allah envoie So bane avertisseurs avant ki Li envoie bane punitions et zamais Li pas envoie nous bane calamités générales (tremblement de terre, la guerres, épidémies, etc.) sans raisons apparentes.

**« Nous pas fine détruire aucaine la ville sans ki li gagne so avertisseur... »** (Ash-Shu'ara 26 : 209)

**« 'Ô société jinns et dimounes, eski bane messagers de parmi ou même pas ti vini pou raconte ou Mo signes, et pou averti ou à propos sa rencontre (avec Moi) aujourd'hui là ?' Zot pou réponde : 'Nous donne témoignage contre nous-mêmes (nous accepter nous fautes).' La vie lors la terre ti embête zot lizié et zot accepter zot faute, ki zot ti rejette la foi. » (An-Anaam 6 : 131)**

Ena détrois scientifiques explique la cause de bane calamités naturelles par l'interconnexion et l'interdépendance entre l'environnement naturel et la moralité de l'humanité. Bane expérimentations de Dr. Masaru Emoto, ene scientifique Japonais, fine prouvé au monde entier ki bane pensées de l'homme, que ce sois zot « bons » ou « mauvais » capave respectivement change so l'environnement. Dans so bane l'expériences, kan ene dimoune émette bane bons pensées, bane cristaux de l'eau forme ene zoli conception harmonieux avec bane couleurs lumineux ki pures ; kan ene dimoune émette bane pensées négatifs et agressifs, bane cristaux là zot détruire, et zot forme ene masse foncé ki difforme [ki péna forme]. Bane les autres études indiquer ki de l'eau contenir tout bane l'information ki vine d'ene être vivant. Sa information là capave reste dans de l'eau sans limites.

Après la manifestation de tous sa bane fléaux là, bane dimounes pé dézà commence réfléchi lors la signification de tout sa dans le monde. Si ena ene relation quelconque entre bane calamités naturelles, et le déclin de bane valeurs morales, nous faire *duahs* ki l'humanité comprend li très bientôt, avant ki li trop tard. Allah (twa) fine dire: **« Tout malheur ki tombe lors ou vine de saki ou la main fine acquérir, tandis ki (Allah) pardonne ou beaucoup. »** (Ash-Shuraa 42 : 31)

Et, **« Calamité (ou Corruption) fine vine lor la terre et dans la mer ; bane actions dimounes même fine mérite sa, et Allah fine faire zot goûte (conséquence) ene partie zot propre actions. Peut-être ki zot va retourne (dans bon chemin, vers Allah). »** (Ar-Rum 30 : 42).

Allah (swt) conne mieux. Ki Allah gagne pitié de So bane serviteurs sincères et sauve nous de tous bane situations difficiles, et ki Allah gagne pitié aussi de toute l'humanité. Allah oulé ki l'humanité écoute Li et tourne vers Li. C'est ene simple demande de la part d'ene Créateur ki fine créer tout et fine donne nous tout. Alors, anous prier pour ki le monde comprend sa très vite, *Insha-Allah*.

\*\*\*

En plus de sa, Huzur (atba) fine cause aussi de la situation à Maurice, tant au niveau politique et bane calamités ki pé tombe lors l'île dans diverses façons. Depuis sa bane quelques jours là, nous pé témoigne ene forte pluie ki pé tomber, et de ce fait, dans le cadre du 52<sup>ème</sup> anniversaire de l'Indépendance du pays (ainsi ki so 28<sup>ème</sup> anniversaire de République), le gouvernement fine ferme bane l'écoles et bane z'enfants zot la caze, et zot privés de zot fête de l'indépendance. Même au niveau du pays, pas ena célébration de la fête nationale.

\*\*\*

**Ensuite, Huzur (atba) fine cause lors bane révélations divines ki li fine recevoir le 09 Mars 2020.**

## RÉVÉLATIONS

09 MARS 2020

**Bismillah-ir-Rahman-ir-Rahim**

**Wa maa kaana li-nafsin 'antu' mina 'illaa bi-'Iz-nillaah: wa yaj-'alu-rijsa 'alal-laziina laa ya'-qiluun.**

Allah (swt) fine révèle moi aujourd'hui ki Li pou répanne sa communauté ki appartenir à Li là (Jamaat Ul Sahih Al Islam) – dans tous bane pays, et Li pou faire li gagne le dessus lors tous bane les autres par bane preuves et bane arguments logiques.

**« Ô Mo Calife Munir Ahmad Azim, voyage à travers le monde entier. Invite bane dimounes vers to Créateur. Sa c'est to travail et rien d'autres. To Mo Calife ; Obéir-Moi seulement, pas les autres créatures. Bane jours pé arriver, zot devant la porte [zot bien près], kot sa religion là [l'Islam] pou li tousel prédominante dans le monde entier. Mette to lipié dans tous bane pays du monde et Mo pou béni tous bane dimounes ki pou croire dans toi, et kot zot tous pou considère ou avec beaucoup de respect. Tous to bane l'ennemis pou alle vers zot destruction et l'échec. Mo avec toi. Obéir-Moi seulement. »**